

# SESIWN GYMRAEG: PAM Y MAE LLAI O FENYWOD YN CHWARAE PÊL-DROED NA DYNION?

Ystod oedran: 9–14 oed

<p><b>Amlinelliad</b> Bydd dysgwyr yn defnyddio “llinell gytuno” i ystyried eu canfyddiadau a’u hagweddau tuag at rywedd a chwaraeon. Yna, byddant yn cydweithio mewn grwpiau i ddarllen a threfnu gwybodaeth er mwyn datrys ‘dirgelwch’ ynghylch pam y mae llai o fenywod yn chwarae pêl-droed na dynion. Bydd y gweithgaredd hwn yn cefnogi dysgwyr i gael trafodaeth strwythuredig ar y pwnc, gan drafod y rhwystrau sy’n wynebu menywod yn y byd pêl-droed a’r ffyrdd posibl o’u goresgyn. Yn olaf, bydd dysgwyr yn trafod enghreifftiau eraill o anghydraddoldeb rhwng y rhywiau yn ein cymdeithas yn ehangach, cyn ystyried y newidiadau y maent am eu gweld yn y maes hwn yn y dyfodol.</p>	
<p><b>Amcanion dysgu</b></p> <ul style="list-style-type: none"> <li>• Defnyddio tystiolaeth mewn testun i gyfiawnhau ymateb.</li> <li>• Datblygu sgiliau meddwl beirniadol, cydweithio a thrafod.</li> <li>• Archwilio a herio eu tybiaethau a’u canfyddiadau eu hunain, a rhai eraill.</li> <li>• Deall ystyr anghydraddoldeb rhwng y rhywiau, yng nghyd-destun pêl-droed ac o ran cyfleoedd mewn bywyd yn gyffredinol.</li> </ul>	<p><b>Deilliannau dysgu</b></p> <ul style="list-style-type: none"> <li>• Bydd dysgwyr yn defnyddio “llinell gytuno” i ystyried eu canfyddiadau a’u hagweddau eu hunain, a rhai eraill, ynghylch rhywedd a chwaraeon.</li> <li>• Bydd dysgwyr yn cydweithio mewn grwpiau i ddarllen, trefnu a thrafod datganiadau sy’n gysylltiedig ag anghydraddoldeb mewn pêl-droed.</li> <li>• Caiff dysgwyr eu cyflwyno i enghreifftiau eraill o anghydraddoldeb rhwng y rhywiau yn ein cymdeithas yn ehangach, cyn ystyried pa newidiadau y maent yn dymuno eu gweld yn y maes hwn yn y dyfodol.</li> </ul>
<p><b>Cwestiynau allweddol</b></p> <ul style="list-style-type: none"> <li>• Pam y byddai rhywun yn meddwl bod math penodol o chwaraeon yn fwy “gwrywaidd” neu “fenywaidd”?</li> <li>• A ddylai fod gan ddynion a menywod fynediad cyfartal at wneud chwaraeon o bob math? A ddylid talu dynion a menywod yr un cyflog am gymryd rhan yn yr un math o chwaraeon? Pam? / Pam ddim?</li> <li>• Beth ydych chi’n credu sy’n rhwystro menywod rhag chwarae pêl-droed? Ydych chi’n credu bod y rhwystrau hyn yn gyffredin ym mhob rhan o’r byd? Pam? / Pam ddim? Sut yr ydych chi’n credu y gellid datrys yr heriau hyn?</li> <li>• A allwch chi feddwl am enghreifftiau eraill lle nad yw cyfleoedd bywyd yn gyfartal i fenywod a dynion neu ferched a bechgyn?</li> <li>• Beth yr hoffech chi ei weld yn digwydd i faes cydraddoldeb rhwng y rhywiau yn y dyfodol?</li> </ul>	<p><b>Adnoddau</b></p> <ul style="list-style-type: none"> <li>• Sioe Sleidiau Gymraeg: <i>Cwpan y Byd: Chwarae Teg?</i></li> <li>• Taflenni adnoddau: <ol style="list-style-type: none"> <li>1. <i>Cardiau Dirgel Pêl-droed 1</i></li> <li>2. <i>Cardiau Dirgel Pêl-droed 2</i></li> </ol> </li> <li>• Taflen weithgaredd: <ol style="list-style-type: none"> <li>1. Dyfodol delfrydol</li> </ol> </li> </ul>

*Noder:* Mae'r gweithgareddau nesaf yn archwilio sefyllfa anghydraddoldeb rhwng y rhywiau, yn y byd pêl-droed a'r byd ehangach, o ran profiadau a rolau gwrywaidd a benywaidd. *Yn dibynnu ar oedran y dysgwyr a'r cyd-destun, efallai y bydd athrawon hefyd am gydnabod a thrafod materion anghydraddoldeb sy'n gysylltiedig â Phobl Lesbiaidd, Hoyw, Deurywiol a Thrawsrywiol+.*

### **Gweithgaredd 1** (15 mun)

*Ble rydych chi'n sefyll?*

*Noder:* Addaswyd y gweithgaredd hwn o syniad addysgu gan y *Gender Respect Project*, a gydlynwyd gan y *Development Education Centre South Yorkshire (DECSY)*: [genderrespect2013.wordpress.com/teaching-ideas/primary/](http://genderrespect2013.wordpress.com/teaching-ideas/primary/)

- Gofynnwch i'r dysgwyr ddechmygu bod llinell ar draws y gofod dysgu, gydag un pen yn "fenywaidd" a'r pen arall yn "wrywaidd". Neu, gallech argraffu labeli "gwrywaidd" a "benywaidd" a'u harddangos ar bob pen o'r llinell.
- Eglurwch i'r dysgwyr y byddwch yn galw enwau gwahanol fathau o chwaraeon. Ar gyfer pob math o chwaraeon, dylai'r dysgwyr sefyll ar ryw ran o'r llinell, gan ddbynnu a ydynt yn ystyried y math hwn o chwaraeon yn fenywaidd, yn wrywaidd, yr un mor gyfartal i'r ddau ryw, neu rywle yn y canol.
- Ar gyfer pob math o chwaraeon, gofynnwch i'r dysgwyr rannu'r rhesymau pam y maent wedi dewis eu safleoedd. Cyn symud ymlaen i'r math nesaf o chwaraeon, anogwch y dysgwyr i addasu eu safle ar y llinell yn seiliedig ar yr hyn y maent wedi ei glywed gan eraill yn y grŵp. Gofynnwch i'r dysgwyr egluro'r rhesymau dros eu safleoedd newydd.
- Gorffennwch trwy drafod y gweithgaredd yn sydyn:
  - *Pam y gallai rhywun feddwl bod math penodol o chwaraeon yn fwy "gwrywaidd" neu "fenywaidd"?*
  - *Pwy newidiodd safle ar ôl clywed gan eraill yn y grŵp? Beth â'ch ysgogodd i newid eich meddwl?*
  - *A ddylai fod gan ddynion a menywod gyfle cyfartal i gymryd rhan ym mhob math o chwaraeon? A ddylid talu cyflogau cyfartal i ddynion a menywod os ydynt yn cymryd rhan yn yr un math o chwaraeon? Pam?/Pam ddim?*
  - *A ydych chi'n credu bod dynion neu fenywod (neu fechgyn a merched) yn gallu cymryd rhan gyfartal ym mhob math o chwaraeon?*

### **Gweithgaredd 2** (40+ mun)

*Pam y mae llai o fenywod yn chwarae pêl-droed na dynion?*

*Noder:* Gelwir y gweithgaredd hwn yn 'dirgelwch' gan fod y dysgwyr yn rhoi cliwiau at ei gilydd sydd wedi eu hysgrifennu ar wahanol ddarnau o bapur er mwyn datrys problem. Mae dirgelion yn arf llythrennedd gwych ar gyfer datblygu sgiliau meddwl beirniadol a sgiliau ffurfio casgliadau. Mae'r dirgelwch hwn yn galluogi'r dysgwyr i archwilio ystod o bethau a allai fod yn achosi anghydraddoldeb rhwng y rhywiau sy'n bodoli yn y byd pêl-droed, ynghyd ag ystyried sut y gall y ffactorau hyn ryngweithio â'i gilydd. Erbyn diwedd y gweithgaredd hwn, ceisiwch sicrhau bod y dysgwyr wedi deall bod gweithredoedd nifer o bobl a grwpiau, ynghyd â pholisïau llywodraethau a chonfensiynau cymdeithasol, yn cyfrannu tuag at y broblem hon, a'r ffyrdd posibl o'i datrys. Am ragor o wybodaeth am ddefnyddio 'dirgelion' yn y dosbarth, gweler t. 15 o gyhoeddiad Oxfam: Dinasyddiaeth Fyd-eang yn yr Ystafell Ddosbarth – Canllaw ar gyfer yr Athro: [www.oxfam.org.uk/education/resources/global-citizenship-in-the-classroom-a-guide-for-teachers](http://www.oxfam.org.uk/education/resources/global-citizenship-in-the-classroom-a-guide-for-teachers)  
<http://www.oxfam.org.uk/education/resources/global-citizenship-in-the-classroom-a-guide-for-teachers>

- Trefnwch y dysgwyr yn grwpiau o dri neu bedwar, ac eglurwch mai'r dasg yw datrys dirgelwch trwy ateb y cwestiwn: *Pam y mae llai o fenywod yn chwarae pêl-droed na dynion? Noder: Efallai y byddwch am dreulio ychydig o amser yn archwilio syniadau'r dysgwyr am y cwestiwn hwn yn gyntaf, cyn dechrau'r gweithgaredd.*
- Rhowch gopi o *Cardiau Dirgel Pêl-droed 1 a 2* (Taflenni adnoddau 1 a 2) i bob grŵp. Eglurwch fod y cardiau hyn yn cynnig set o gliwiau, efallai y bydd rhai ohonynt yn fwy defnyddiol nag eraill. Dylai'r dysgwyr dorri'r datganiadau allan a gweithio fel grŵp er mwyn ystyried eu hymateb i'r cwestiwn.
- Dywedwch wrth y dysgwyr fod angen iddynt geisio datrys y dirgelwch trwy drefnu'r wybodaeth a ddarperir yn y cliwiau ar y cardiau. Dylid eu hannog i chwilio am yr hyn sy'n cysylltu'r cliwiau â'i gilydd, a grwpio'r cliwiau mewn ffyrdd i'w helpu i egluro, mor llawn â phosibl, yr amryw resymau pam y mae llai o fenywod yn chwarae pêl-droed na dynion. Gallent hepgor rhai cardiau os nad ydynt yn teimlo bod yr wybodaeth yn berthnasol, a gallwch roi cardiau gwag iddynt er mwyn ychwanegu eu pwyntiau eu hunain. Pwysleiswch y bydd angen i'r dysgwyr fod yn barod i gyfiawnhau eu hatebion i eraill, ac ewch ati i'w hannog i drafod yn eu grwpiau yr achosion, yr effeithiau a'r cysylltiadau y maent yn eu creu.
- Ar ôl i'r dysgwyr gwblhau'r dasg, rhowch amser i bob grŵp rannu eu hymateb â gweddill y dosbarth. Yn ddibynol ar yr hyn sy'n deillio o'r drafodaeth, anelwch at adolygu'r pwyntiau canlynol:
  - *O'r hyn a gasglwyd gennych, pam y mae llai o fenywod yn chwarae pêl-droed na dynion?*
  - *A ydych chi'n credu bod y ffactorau sy'n rhwystro menywod rhag chwarae pêl-droed yr un peth ledled y byd? Pam?/Pam ddim?*
  - *Beth ydych chi'n credu fyddai'n helpu mwy o ferched a menywod i chwarae pêl-droed?*
  - *Pwy ydych chi'n credu sy'n gyfrifol am ei gwneud hi'n haws i fenywod a merched chwarae pêl-droed?*
  - *A ydych chi'n credu bod mynediad i bêl-droed menywod yn gwella? Pa dystiolaeth sydd gennych i gefnogi hyn?*
  - *A ydych chi'n gallu meddwl am fathau eraill o chwaraeon sy'n anghyfartal o ran y mynediad i ddynion a menywod? A oes unrhyw fathau o chwaraeon lle mae llai o ddynion yn cymryd rhan ynddynt na menywod? Beth yw'r mathau hyn o chwaraeon, a pham ydych chi'n credu hyn? Er enghraifft, efallai yr hoffech gyfeirio at Loegr yn ennill y twrnament pêl-rwyd yng Ngemau'r Gymanwlad yn 2018.*
  - *A ydych chi'n gallu meddwl am enghreifftiau eraill lle y gall cyfleoedd bywyd fod yn anghyfartal i fenywod a dynion neu ferched a bechgyn?*
  - *A ydych chi'n credu bod anghydraddoldeb rhwng y rhywiau (yn y byd pêl-droed neu mewn maes arall) yn broblem yn eich ysgol neu yn eich cymuned? Pa dystiolaeth sydd gennych i gefnogi hyn? Beth ydych chi'n credu sydd angen ei wneud i newid pethau, a phwy ddylai fynd ati i'w newid?*
- Er mwyn ymestyn y gweithgaredd hwn, gellid gofyn i ddysgwyr ysgrifennu darn o waith estynedig, gan ddefnyddio ffrâm ysgrifennu, i ymateb yn llawn i'r cwestiwn pam y mae llai o fenywod yn chwarae pêl-droed na dynion. Gallai'r ffrâm ysgrifennu gynnwys penawdau megis:
  - *Cyflwyno'r broblem.*
  - *Beth sy'n atal menywod rhag chwarae pêl-droed?*
  - *Sut y mae pethau wedi newid dros amser? Sut yr ydych chi'n credu y bydd y sefyllfa'n newid yn y dyfodol?*
  - *Sut yr ydych chi'n credu y gellir datrys hyn?*

## Gwahaniaethu

- *Gwneud pethau'n haws*: Rhannwch y cardiau dirgel ymysg y grwpiau fel bod gan bob grŵp ddau neu dri o gardiau yn unig i'w darllen, ac i chwilio am gliwiau arnynt. Gofynnwch i bob grŵp rannu eu syniadau cyn gweithio gyda'i gilydd fel dosbarth cyfan i "ddatrys" y dirgelwch.


## Gweithgaredd 3 (30+ mun)

*Cyfartal neu anghyfartal yn y dyfodol?*

- *Noder: Ymarfer mapio meddwl yw'r gweithgaredd hwn, sy'n helpu pobl i ystyried a mynegi eu syniadau – yn rhai cadarnhaol a negyddol – am y dyfodol. I gael rhagor o fanylion, gweler t. 18 o gyhoeddiad Oxfam, Global Citizenship in the Classroom: A guide for teachers:: [www.oxfam.org.uk/cy-GB/education/resources/global-citizenship-in-the-classroom-a-guide-for-teachers](http://www.oxfam.org.uk/cy-GB/education/resources/global-citizenship-in-the-classroom-a-guide-for-teachers)*
- Atgoffwch y dysgwyr eu bod, yn y gweithgaredd diwethaf, wedi archwilio rhai o'r rhesymau pam y mae llai o fenywod yn chwarae pêl-droed na dynion. Eglurwch fod hyn yn enghraifft o anghydraddoldeb rhwng y rhywiau.
- Dangoswch sleid 3 o'r sioe sleidiau Gymraeg ac eglurwch y gallwn ystyried anghydraddoldeb fel y gwahaniaeth rhwng y pethau sydd gan rai grwpiau o bobl o'u cymharu â grwpiau eraill o bobl. Mae bron fel edrych ar ba mor fawr yw'r darn o gacen sydd gan un person o'i gymharu â'r darn sydd gan berson arall.
- Dangoswch sleid 4 a dywedwch fod pobl yn aml yn meddwl am anghydraddoldeb o ran faint o arian neu gyfoeth sydd gan wahanol bobl; mae anghydraddoldeb hefyd yn ymwneud â chyfleoedd pobl, e.e. mynediad at ddŵr glân, mynd i'r ysgol, ymweld â'r doctor neu chwarae pêl-droed.
- Eglurwch fod anghydraddoldeb yn bodoli rhwng gwledydd, a bod gan rai gwledydd fwy o gyfoeth na gwledydd eraill. Fodd bynnag, mae hefyd anghydraddoldeb o fewn gwledydd rhwng gwahanol grwpiau o bobl, e.e. rhwng rhai sy'n byw mewn ardaloedd gwledig ac ardaloedd trefol, pobl o wahanol ethnigrwydd a phobl o wahanol rywiau.
- Dangoswch sleid 5 a gofynnwch i'r dysgwyr a allant feddwl am enghreifftiau o anghydraddoldeb rhwng dynion a menywod neu ferched a bechgyn, heblaw am yn y byd pêl-droed. Trafodwch yr hyn y mae'r dysgwyr yn credu sy'n achosi'r anghydraddoldebau hyn.
- Dangoswch sleid 6 ac eglurwch fod llawer o gynnydd wedi ei wneud yn y degawdau diwethaf i wneud bywyd yn decach i fenywod ac i ferched. Er enghraifft:
  - *Dim ond 100 mlynedd yn ôl y cafodd rhai menywod yr hawl i bleidleisio yn y DU. Heddiw, y mae gan fenywod yr hawl i bleidleisio ym mron pob gwlad yn y byd.*
  - *Mae mwy o ferched yn mynd i'r ysgol nag erioed o'r blaen.*
  - *Mae mwy o fenywod yn gweithio am dâl.*
  - *Mae cyfreithiau mewn grym ledled y byd i gefnogi anghydraddoldeb rhwng y rhywiau.*
- Fodd bynnag, nid yw'n fêl i gyd; mae llawer i'w wneud eto cyn i gyfleoedd bywyd fod yn gyfartal i fenywod a dynion. Rhannwch y ffeithiau ar sleid 7.
  - *Mae mwyafrif y rhai sy'n byw mewn tlodi yn fenywod ac yn ferched.<sup>1</sup>*
  - *Mae menywod yn fwy tebygol na dynion o fod mewn gwaith â chyflog isel. Maent yn ennill llai o gyflog am wneud yr un rolau, a hefyd maent yn aml yn y rolau sy'n derbyn llai o gyflog.<sup>1</sup>*

<sup>1</sup> F Rhodes, A Parvez ac R Harvey (2017). *An economy that works for women*. Oxfam.

- *Ar gyfartaledd, mae menywod yn gwneud dwywaith cymaint o waith gofal di-dâl â dynion, megis gofal plant a gwaith tŷ – weithiau 10 gwaith cymaint, yn aml ar ben eu gwaith cyflogedig.<sup>1</sup>*
- *Dim ond 23% o seneddwyr ledled y byd sy'n fenywod.<sup>2</sup>*
- Rhowch amser i'r dysgwyr ystyried y ffeithiau hyn. Efallai yr hoffech wneud hyn ar ffurf gweithgaredd *Meddwl, Paru, Rhannu*:
  - *Meddwl: Gofynnwch i'r dysgwyr feddwl ar eu pennau eu hunain am funud.*
  - *Paru: Rhowch funud neu ddwy i'r dysgwyr gymharu eu syniadau.*
  - *Rhannu: Treuliwch rai munudau yn rhannu rhai o awgrymiadau'r dysgwyr i'r grŵp cyfan.*
- Ewch ati 'nawr i rannu'r dysgwyr yn barau neu'n grwpiau o dri. Rhowch ddarn mawr o bapur i bob grŵp.
- Yn eu grwpiau, dylai'r dysgwyr dynnu llinell amser ar ddarn mawr o bapur (gweler y diagram isod ac ar sleid 8). Fel arall, gallech ddsbarthu copiâu A3 o'r templed a ddarperir yn *Dyfodol delfrydol* (Taflen weithgaredd 1).
- Ar y llinell amser is, dylai'r dysgwyr nodi'r pethau y maent yn meddwl a fydd yn debygol o ddigwydd mewn perthynas ag anghydraddoldeb rhwng y rhywiau. Gellir eu cynrychioli mewn sawl ffordd, er enghraifft geiriau, darluniau neu ddelweddau wedi'u torri allan. Ar hyd y llinell amser uchaf, dylai'r dysgwyr ychwanegu'r pethau y byddai'n well ganddynt eu gweld yn digwydd.



- Caniatewch amser i'r dysgwyr rannu eu llinellau amser a'u syniadau am y dyfodol â grwpiau eraill. Ymhlith y cwestiynau trafod posibl y mae:
  - *Pa newidiadau ar gyfer dynion a menywod yr ydych yn meddwl sydd fwyaf tebygol o ddigwydd?*
  - *Pa newidiadau y byddai'n well gennych eu gweld yn digwydd?*
  - *A oes unrhyw un arall yn rhannu eich gweledigaeth ar gyfer y dyfodol? Os felly, pwy? Gall yr unigolyn hwn fod yn rhywun yn eich dosbarth, eich ysgol neu eich cymuned, neu'n berson enwog.*
  - *Beth sydd angen ei newid os yw'r dyfodol yr ydych yn ei ffafrio yn mynd i ddod yn wir? Beth yw'r heriau a sut y gellir eu goresgyn?*
  - *Pwy sy'n gweithredu i greu dyfodol o'r fath? Pwy arall a ddylai fod yn gweithredu?*
  - *Sut y gallwn ni ein hunain gyfrannu at y dyfodol hwn a ffeirir?*
  - *Beth fydd yn digwydd os na chymerir unrhyw gamau?*

<sup>2</sup> [archive.ipu.org/wmn-e/world.htm](http://archive.ipu.org/wmn-e/world.htm)

## Gwahaniaethu

- *Gwneud pethau'n haws: Gofynnwch i'r dysgwyr ganolbwyntio ar enghraifft benodol o anghydraddoldeb rhwng y rhywiau, er enghraifft menywod yn chwarae pêl-droed, yn hytrach na chanolbwyntio ar y mater yn gyffredinol.*
- *Gwneud pethau'n anos: Gofynnwch i'r dysgwyr ymestyn y llinell amser i'r chwith (fel y dangosir yn y diagram), gan fynd yn ôl mewn amser cyn y presennol. Gallent wedyn anodi'r llinell hon i ddangos newidiadau sydd wedi digwydd mewn perthynas ag anghydraddoldeb rhwng y rhywiau yn y gorffennol.*

## Syniadau pellach

- Rhowch gynnig ar weithgareddau a syniadau addysgu eraill o'r *Gender Respect Project*. Nod y prosiect hwn, dan arweiniad DECSY, yw helpu plant a phobl ifanc i ddeall, cwestiynu a herio anghydraddoldeb rhwng y rhywiau a thrais, a hynny mewn cyd-destunau lleol a byd-eang:  
[genderrespect2013.wordpress.com/teaching-ideas/](http://genderrespect2013.wordpress.com/teaching-ideas/)
- Defnyddiwch weithgareddau o Fforwm FYS i ddysgu rhagor am anghydraddoldeb rhwng y rhywiau. Mae'r fforwm FYS yn cynnig syniadau, methodolegau ac adnoddau addysgu ar gyfer archwilio materion rhywedd trwy fforymau ieuencid. Efallai yr hoffai'r dysgwyr gynnal fforwm gydag ysgolion eraill yn eu cymuned leol.  
[fys-forums.eu/en/fys-toolkit/forum-curriculum](http://fys-forums.eu/en/fys-toolkit/forum-curriculum) <<http://fys-forums.eu/en/fys-toolkit/forum-curriculum>>
- Ysgrifennwch stori am bêl-droed a ddefnyddiwyd yng Nghwpan y Byd 2018. Meddyliwch am ba le yn y byd y gwnaed y bêl, sut y cafodd ei chynhyrchu a'r bobl a oedd yn rhan o'r gadwyn gyflenwi. Disgrifiwch amodau gwaith ac elw'r gwahanol bobl dan sylw, o'r ffatri lle cafodd ei chynhyrchu i'r defnyddiwr ar ddiwedd y gadwyn. Yn aml, effeithir yn fwy negyddol ar fenywod a phlant na dynion o fod ar waelod y gadwyn gyflenwi; er enghraifft trwy effeithio ar faint o amser sydd ar gael ar gyfer gofal plant neu i fynd i'r ysgol.
- Gwylwch glip fideo byr (*Playing Fair: The Story of Fair Trade Footballs*) o'r Sefydliad Masnach Deg i ddarganfod sut y caiff y bêl-droed ei gwneud ym Mhacistan a'r effaith y mae Masnach Deg wedi'i chael ar fywydau rhai pobl sy'n ymwneud â'i chynhyrchu:  
[schools.fairtrade.org.uk/resource/football/](http://schools.fairtrade.org.uk/resource/football/) (8 mun, 5 eiliad)
- Gweler *Fair's fair – Life and rights in the global sports industry* gan Playfair, 2012 i ddysgu mwy am rai o'r bobl sy'n creu'r nwyddau hyn mewn gwledydd tlotach, yn aml yn gweithio heb fawr ddim hawliau, ac am gyflogau isel iawn:  
[www.playfair2012.org.uk/wp-content/uploads/2011/09/TUC\\_Fairs-fair\\_booklet.pdf](http://www.playfair2012.org.uk/wp-content/uploads/2011/09/TUC_Fairs-fair_booklet.pdf)
- Bu llawer o ddadlau ynghylch llwyfannu Cwpan y Byd 2018 yn Rwsia, gyda rhai pobl yn galw ar wledydd a thimau i foicotio'r digwyddiad. Trefnwch dadl ar y pwnc llosg hwn: *A ddylai Lloegr gymryd rhan yng Nghwpan y Byd 2018?* I gael arweiniad, strategaethau ystafell ddosbarth a gweithgareddau addysgu ymarferol ar gyfer rheoli materion dadleuol yn yr ystafell ddosbarth, gweler canllaw Oxfam, *Teaching Controversial Issues*, a ddiweddarwyd yn ddiweddar:  
[www.oxfam.org.uk/education/resources/teaching-controversial-issues](http://www.oxfam.org.uk/education/resources/teaching-controversial-issues)
- Defnyddiwch y rhyngwyd i ymchwilio i'r ffordd y mae gwahanol fudiadau'n mynd ati i hybu cydraddoldeb rhwng y rhywiau. Archwiliwch y targedau ar gyfer cydraddoldeb rhwng y rhywiau fel yr amlinellir yn y Nodau Datblygu Cynaliadwy: *Pa mor dda y mae dysgwyr yn meddwl y bydd y targedau hyn o ran helpu i gyflawni'r dyfodol yr hoffent ei weld?*  
[www.undp.org/content/undp/en/home/sustainable-development-goals/goal-5-gender-equality/targets/](http://www.undp.org/content/undp/en/home/sustainable-development-goals/goal-5-gender-equality/targets/)
- Defnyddiwch y dull Athroniaeth ar gyfer Plant (P4C) i hwyluso trafodaeth, meddwl yn feirniadol a myfyrio ymhlith dysgwyr ar fater anghydraddoldeb rhwng y rhywiau. Cefnogwch y dysgwyr i ddewis cwestiwn athronyddol ar y cyd sy'n gysylltiedig â'r mater, naill ai'n gysylltiedig â phêl-droed neu'n gysylltiedig ag enghraifft arall o anghydraddoldeb

rhwng y rhywiau. Cyflwynwch sgiliau ac iaith athronyddol i alluogi dysgwyr i gael deialog o ansawdd uchel o amgylch y cwestiwn hwn. Am ragor o fanylion ar ddefnyddio P4C yn y dosbarth, gweler canllaw Oxfam: Oxfam's *Guide to Philosophy for Children*, a ddatblygwyd ar y cyd â SAPERE, y Gymdeithas er Hyrwyddo Ymholi a Myfyrio Athronyddol mewn Addysg:

[www.oxfam.org.uk/education/resources/philosophy-for-children](http://www.oxfam.org.uk/education/resources/philosophy-for-children)

## Telerau defnyddio

Hawlfraint © Oxfam GB

Gallwch ddefnyddio lluniau a gwybodaeth berthnasol yn yr adnodd hwn i ddibenion addysgol yn eich sefydliad addysgol. Bob tro y byddwch yn ei defnyddio, rhaid i chi gydnabod y ffotograffydd sy'n cael ei enwi ar gyfer y ddelwedd honno, ynghyd ag Oxfam. Ni chewch ddefnyddio'r delweddau na'r wybodaeth gysylltiedig i ddibenion masnachol, nac y tu allan i'ch sefydliad addysgol. Mae'r holl wybodaeth sy'n gysylltiedig â'r delweddau hyn yn berthnasol i'r dyddiad a'r adeg y cafodd y gwaith prosiect hwnnw ei gyflawni. Er bod yr adnodd hwn yn cyfeirio at Gwpan y Byd drwyddo draw, mae hyn ar gyfer defnydd golygyddol yn unig, ac nid oes cysylltiad mewn unrhyw ffordd rhwng FIFA a'r adnodd hwn.



## Cardiau Dirgel Pêl-droed 1

## Taflen Adnoddau 1

<p>Cynhaliwyd y gêm bêl-droed menywod gyhoeddus gyntaf a gofnodwyd ym 1881. Sefydlwyd Clwb Pêl-droed Menywod Prydain ym 1894.</p>
<p>Mae cyflogau cyfunol pawb sy'n chwarae yn y saith prif gynghrair i fenywod (1,693 o chwaraewyr yn Ffrainc, yr Almaen, Lloegr, UDA, Sweden, Awstralia a Mecsico) bron yr un faint â thâl blynyddol un pêl-droediwr gwrywaidd, yr ymosodwr o Frasil, Neymar, sy'n chwarae i'r clwb Ffrengig, Paris Saint-Germain. Bydd Neymar yn ennill £32.9 miliwn yn 2017/18 o'i contract gyda'r clwb, er y bydd wir yn ennill lawer yn fwy na hyn trwy ei gytundebau masnachol.<sup>3</sup></p>
<p>Mae pêl-droed menywod yn cael llawer llai o sylw ar y teledu a'r cyfryngau na phêl-droed dynion. Dim ond 7% o'r holl ddarllediadau chwaraeon yn y DU yw chwaraeon menywod – ar y teledu, ar y radio, ar-lein ac mewn papurau newydd.<sup>4</sup></p>
<p>Daeth pêl-droed menywod yn boblogaidd iawn tua diwedd y Rhyfel Byd Cyntaf. Ar y pryd, roedd gan lawer o fenywod swyddi mewn ffatrioedd, gan gymryd lle'r dynion a oedd wedi mynd i ymladd. Roedd tua 150 o dimau menywod yn Lloegr ac roedd gemau pêl-droed menywod yn aml yn denu torfeydd mwy na gemau'r dynion.</p>
<p>Cynhaliwyd y Cwpan y Byd Menywod answyddogol gyntaf yn yr Eidal ym 1970, er nad oedd pencampwriaeth gyntaf Cwpan y Byd Menywod FIFA tan 1991. Cynhaliwyd y Cwpan y Byd FIFA gyntaf (i ddynion) ym 1930.</p>
<p>Ar 5 Rhagfyr 1921, gwaharddodd y Gymdeithas Bêl-droed fenywod rhag chwarae ar gaeau sy'n gysylltiedig â'r Gymdeithas Bêl-droed. Credid bod pêl-droed yn "eithaf anaddas i fenywod". Gwaharddwyd menywod hefyd rhag chwarae pêl-droed mewn gwledydd eraill, megis yr Almaen a Brasil.</p>
<p>Ym mis Ionawr 2018, aeth menywod yn Sawdi Arabia i gêm bêl-droed yn y wlad am y tro cyntaf. Hyd at hynny, nid oedd menywod wedi cael mynd i mewn i unrhyw stadiwm. Dim ond ers 2017 y caniatwyd i ferched yn ysgolion y wladwriaeth yn Sawdi Arabia gymryd rhan mewn gwersi Addysg Gorfforol.</p>
<p>Cynhaliwyd pencampwriaeth bêl-droed swyddogol gyntaf menywod Ewrop ym 1984, 24 mlynedd ar ôl pencampwriaeth gyntaf y dynion, a gynhaliwyd ym 1960.</p>
<p>Clwb Pêl-droed Lewes yn ne-ddwyrain Lloegr oedd y clwb pêl-droed proffesiynol neu led-broffesiynol cyntaf yn ddiweddar i dalu'r un cyflog i'w chwaraewyr pêl-droed gwrywaidd a benywaidd.</p>
<p>Codwyd gwaharddiad y Gymdeithas Bêl-droed ar fenywod yn chwarae pêl-droed ym 1971.</p>

<sup>3</sup> Sporting Intelligence (2017). Arolwg *Global Sports Salaries 2017*. [globalsportssalaries.com/](http://globalsportssalaries.com/)

<sup>4</sup> Women in Sport (2015). Pecyn ystadegau i'r cyfryngau. [www.womeninsport.org/wp-content/uploads/2015/04/Media-Stats-Pack-June-2015.pdf?938151](http://www.womeninsport.org/wp-content/uploads/2015/04/Media-Stats-Pack-June-2015.pdf?938151)



## Cardiau Dirgel Pêl-droed 2

## Taflen Adnoddau 2

<p>£2.64 miliwn yw cyflog cyfartalog chwaraewyr yn yr Uwch Gynghair (prif gystadleuaeth bêl-droed dynion yn Lloegr), 99 gwaith yn uwch na'r cyflog cyfartalog yn Uwch Gynghair y Merched (prif gystadleuaeth bêl-droed menywod Lloegr), sef £26,572.<sup>5</sup></p>
<p>Dim ond 2% o'r holl chwaraewyr pêl-droed benywaidd, sy'n ymwneud â'r gamp ar hyn o bryd, sy'n famau. Dim ond 3% o glybiau pêl-droed yr isadran uchaf ledled y byd sydd â chyfleusterau crèche<sup>6</sup>.</p>
<p>Amcangyfrifir bod 137,021 o chwaraewyr pêl-droed proffesiynol gwrywaidd yn y byd, o'i gymharu â 1,287 o fenywod. Golyga hyn fod llai nag 1% o chwaraewyr pêl-droed proffesiynol y byd yn fenywod.<sup>5</sup></p>
<p>Daeth pêl-droed menywod yn gamp Olympaidd ym 1996. Mae pêl-droed dynion wedi ei gydnabod yn gamp Olympaidd ers 1900.</p>
<p>Ym mis Hydref 2017, cytunodd Cymdeithas Bêl-droed Norwy i dalu'r un cyflog i chwaraewyr yn eu timau cenedlaethol gwrywaidd a benywaidd. Norwy yw'r wlad gyntaf yn y byd i wneud hyn. Fel arfer, mae menywod sy'n chwarae dros eu gwlad yn cael llawer llai o gyflog na chwaraewyr yn nhîm y dynion. Ledled y byd, nid yw 35% o chwaraewyr timau cenedlaethol benywaidd yn cael unrhyw gyflog<sup>6</sup>.</p>
<p>Awgrymwyd mewn arolwg diweddar fod llawer o fenywod yn y DU yn parhau i fod nerfus am gymryd rhan mewn chwaraeon megis pêl-droed, sy'n cael eu hystyried gan nifer o bobl yn "chwaraeon gwrywaidd"; maent yn bod yn poeni am ganfyddiad posibl eraill ohonynt.</p>
<p>Bellach, pêl-droed yw'r gamp tîm fenywaidd fwyaf poblogaidd yn Lloegr.</p>
<p>Mae presenoldeb mewn gemau pêl-droed i fenywod yn y DU wedi cynyddu'n fawr yn ystod y blynyddoedd diwethaf. Yn 2013, ychydig yn llai na 5,000 o bobl a aeth i Rownd Derfynol Cwpan Cymdeithas Bêl-droed y merched; yn 2018, roedd dros 45,000 o bobl yno. Aeth dros 89,000 o bobl i Rownd Derfynol Cwpan Cymdeithas Bêl-droed y dynion yn 2017.</p>
<p>Mae nawdd yn ffynhonnell incwm bwysig i chwaraeon fel pêl-droed. Fodd bynnag, rhwng 2011 a 2013, dim ond 0.4% o gyfanswm y nawdd chwaraeon a aeth tuag at fenywod. Mae hynny'n golygu bod dros 99% o'r arian wedi mynd tuag at chwaraeon dynion.<sup>7</sup></p>
<p>Erbyn y byddant yn 10 oed, bydd 95% o fechgyn yn chwarae rhyw fath o bêl-droed. Dim ond 41% yw'r ffigur i ferched<sup>8</sup>.</p>
<p>Yn aml, mae gan fenywod lai o amser hamdden na dynion. Ar gyfartaledd, mae menywod yn gwneud dwywaith cymaint o waith gofal di-dâl, megis gofal plant a gwaith tŷ, o'i gymharu â dynion – weithiau 10 gwaith cymaint, yn aml ar ben eu gwaith cyflogedig.<sup>9</sup></p>

<sup>5</sup> Sporting Intelligence (2017). Arolwg *Global Sports Salaries 2017*. [globalsportssalaries.com/](http://globalsportssalaries.com/)

<sup>6</sup> FIFPro (2017). 2017 Adroddiad Cyflogadwyedd Byd-eang FIFPro. Amodau gwaith Pêl-droed Proffesiynol Menywod. [www.fifpro.org/en/women-football-committee/2017-employment-report](http://www.fifpro.org/en/women-football-committee/2017-employment-report)

<sup>7</sup> [www.womeninsport.org/how-were-doing-it/sponsorship-media/](http://www.womeninsport.org/how-were-doing-it/sponsorship-media/)

<sup>8</sup> [www.thefa.com/news/2015/jun/08/we-can-play-release-090615](http://www.thefa.com/news/2015/jun/08/we-can-play-release-090615)

<sup>9</sup> F. Rhodes, A Parvez ac R. Harvey (2017). *An economy that works for women*. Oxfam. [www.oxfam.org/en/research/economy-works-women](http://www.oxfam.org/en/research/economy-works-women)

Dyfodol delfrydol

Taflen weithgaredd 1

